



天主降生一千八百四十七年重刊

大
詩
八
十
篇



司教熱羅尼莫馬

准

序

知識固以考稽而漸闡。學業尤須
簡切而易入。洪東大道燦然。未有不
先其要領。而後其條目者也。粵稽聖
經。諸書載籍浩繁。泛而慕焉。幾尋
坐洋之嘆。揚其要矣。奚殊指掌之間。

所慮三仇環繞。八面張羅。倘犯無謂。
其趨避云才。豫以切要。之至。雖年
齒既高。犹難見險。而示脩。况在於齡
總角。之子乎。於凡。_之子第者。首湏端
其趨向。而欲端其趨向者。惟受養于聖
言而已。爰集是編。句箋字釋。綱舉目

張名曰聖教要理選集。俾按覽者。
因文而義。一目瞭然。不獨孩童初婦宜
奉為系繫之基。即既冠高年。亦可藉
為立身之本。洵航海之指南。而上昇
之階梯也。要之文既簡而要。詞既約而
候。究有母以淺易而忽。將其改過。

序

有門。有軒。有跡。昧劄涌於口。緜劄銘
于心。而大本大原之道。可謹此而累窺。
其一斑矣。是為序。



畸人十篇序

西泰子浮槎九萬里而來所歷沉沙狂颶與夫
啖人略人之國不知幾許而不苗不害孜孜求
友酬應頗繁一介不取又不致乏絕始不肖以
爲異人也覩其不婚不宦寡言飭行日惟是潛
心修德以昭事乎上主以爲是獨行人也復徐

印之其持議崇正闢邪居恆手不釋卷經目能
逆順誦精及性命博及象緯與地旁及句股算
術有中國儒先累世發明未晰者而悉倒囊究
數一二則以爲博聞有道術之人迄今近十年
而所習之益深所稱妄言妄行妄念之戒消融
都淨而所修和天和人和己之德純粹益精意

期善世而行絕畛畦語無擊排不知者莫測其
倪而知者相悅以解閒商以事往往如其言則
當不如其言則悔而後識其爲至人也至人侔
於天不異於人乃西泰子近所著書十篇與天
主實義相近以行於世顧自命曰畸人其言闢
切人道大約淡泊以明志行德以俟命謹言苦

志以禔身絕欲廣愛以通乎天載雖強半先聖
賢所已言而警喻博證令人讀之而迷者醒貪
者廉傲者謙妒者仁悍者悌至於常念死候引
善防惡以祈佑於天主一唱三歎尤爲砭世至
論何畸之與有蓋嘗悲夫死之必於不免且不
能以遲速料也上主之臨汝而不可貳也獲罪

於天莫之禱也惡人齋戒之可以事主也童而
習之智愚共識然而迷謬本原怠忽祇事年富
力強而無志迅奮鐘鳴漏盡而尚諱改圖者眾
也非譚玄以固生卽佞佛爲超死死可超生可
罔世有是哉人心之病愈劇而救心之藥不得
不瞑眩暝眩適於德猶是膏梁之適於口也有

知十篇之於德適也不畸也耶

萬曆戊申歲日在箕虎林李之藻盥手謹序



畸人十篇序

利先生者出自西國來遊中華余往郡伯
翁公得其書寓目爲作而歎曰此固一新
亟是乎其所載三道曰自責自省利行為
祥要以薰惡而迪善乃至言不為吾儒併
不為柱下漆園竺乾氏而獨揭天主之教

以為之宗古未之前闻也至若篇中譚生
死之際出垂之法旁引博喻其子種之倉
獲而其旨附會合雜充贊固生多所不入
使人煩讀之而清悠讀之而愉昏倦取眠
讀之而醒俗念忽消道念潛滋嗚呼寧獨
其言之新奇若是哉抑儒之無而為柱下

漆園也柱下漆園之復而為三孔氏也雖
大旨歸於董惡迪善而其說由實入玄由
也入焉漸墮乎恍惚沉洋不可端倪之域
故賢者借之以融貫執拂不肖者亦借之
以濟守跳匿蓋利害久得失焉若斧篇者
根柢奚則勑上懋絕檢約遠傳也課玄徵

實不可得而影響模稜以閃寄於善惡之間此吾儒之藩園百幸利而多害者也今朝廷方統一重其矯易邪慝諸有以二氏之

宗標幟啓疆者叛降同敗是編揆諸切今以自合符宜可廢而不存哉

附溫陵張二水先生贈西泰艾思及先

生詩

昔我遊京師曾逢西泰氏貽我十篇書
名篇畸人以我時方少年未省究生死
徒作文字看有似風過耳及茲既老大
頗知惜餘齒學問無所成深悲年月駛
取書再三讀低徊抽屨旨始知十篇中

篇篇皆妙理九原不可作勝友迺嗣起
著書相羽翼河源互原委孟氏言事天
孔聖言克己誰謂子異邦立言乃一揆
方域豈足論心理同者是詩禮發塚儒
操戈出弟子口誦聖賢言心營錐刀鄙
門牆堂奧間咫尺千萬里

浣城劉亂昌



卷上目錄

人壽既過誤猶爲有

一張

人於今世惟僑世耳

五張

常念死後利行爲祥

十張

常念死後備死後審

十九張

君子希言而欲無言

三十一張

齋素正旨非由戒殺

四十三張



卷之二

金

重刻畸人十篇卷上

泰西利瑪竇述

人壽既過誤猶爲有

第一

李太宰問余之年。余時方造艾。則答曰。已無五旬矣。太宰曰。意貴教以有爲無耶。余曰。否也。是年數者往矣。竇不識今何在。故不敢云。今有爾。太宰疑之。余繼而曰。有人於此。獲粟五十斛。得金五十鎰。藏之在其廩。若橐中。則可出而用之。資給任意。斯謂之有已。已空廩橐。費而猶有乎。夫年

以月月以日累結之。吾生世一日。日輪既入地。則年與月。
與吾壽悉減一日也。月至晦。年至冬。亦如是。吾斯無日無
年焉。身日長而命日消矣。年歲已過。云有謬耶。云無謬耶。
太宰惺余先答之意。大悅曰。然。歲既逝。誠不可謂有與。余
又曰。苟有人焉。獲金幾許。鑑粟幾許。斛用之易。布帛什器。
以自養。養老慈幼。無卽無矣。猶可爲有焉。若呼盧擲去之。
或委諸壑。或與之非其人也。是無爲真無矣。惜乎。寶已往
之年。於治國無功。於家政無營。於身德無修。是年時已用

徒用也。則今無而誠無之矣。令我僞云猶有乎。太宰曰。噫。
子何言之謙也。以爲徒過光陰。無所事事。無前壽矣。世有
不肖者。從少臻耄。侮天耳。害人耳。汚己耳。天大慈。更益之。
以壽。望其改行。而彼反用之增愆也。迨身將斃。則年數與
惡積等焉。殆哉。子言之。其壽有平無平。余曰。不如未生矣。
旣而太宰易席於堂。見其諸戚。述前問答語曰。夫西庠實
學。大獲裨於行。汝儕當繹之。勿忘矣。嗚呼。時之性永流。而
不可畱止焉。已往年不爲有。矧未之來與。余故爲日晷箴。

曰。時之往者已去而不可追。時之來者未至而不可迎。時者何在。惟目下過隙白駒可修可爲。藉如用此以作無益。則無益者待何時乎。凡物之失。以力可追復。以勤可裨補。惟時者否也。今日一去。來日益多。今日益遠矣。胡能復廻乎。來日之日。力僅足來日之事爲耳。胡有餘以補今日之失乎。春已至。農不得補。冬之失時。老已至。人不得補。少年之失時也。故無時可徒費焉。夫物之爲我有。而便於用者。無如吾之年。年者與我同生同死。無人能強脫之。無時不

我隨無處不我左右矣。智者知日也。知日之爲大寶矣。一日一辰猶不忍空棄也。昔日吾鄉有一士。常默思對越天。主務以行事。仰合其旨。不得爲俗事所脫。一日值事急。茫然一辰忘而勿思。旣而猛醒。卽悔歎曰。嗟嗟。盡一辰弗念。天主如禽獸焉。茲士一辰不思道。咤已爲禽獸。有人終日無是念。期年忘之。奚不嘗已爲草木土石乎哉。至人者。惟寸影是寶。而恒覺日如短焉。愚人無所用心。則覓戲玩以遺日。我日不暇給。猶將減事以就日也。暇嬉遊哉。實心務

道者。視己如行旅。懷珍貝。走曠野。俄日暮昏黑。而不識路。又不知安宿處。遠耶近耶。是時可緩行乎。可不戒心勤慎乎。夫日本無不祥。無空亡。凡有日。不聊用。寡汝過。不聊用長汝德。卽此日也。可謂日之不祥。日之空亡耳。常人爲財有急用。恒自惜財。君子爲日有正用。恒自惜日。嗚呼。世人孰有重視時。孰不輕一日。容易棄擲焉。而烏知一日之功。吾可致無盡善。可免無量愆。鄙哉蜘蛛之爲蟲也。終身巧織張網罟。羅蚊蠅。而數爲風所散壞也。人有終生務淺微。

事而猶不得遂。何異此乎。夫世事世物。吾不可卻亦不可
畱。故賢者借心焉。不肖者贈心焉。借者暫寄。贈者卽非吾
有矣。吁。世之人何大悞也。晨夕亟於俗情。若論及道德檢
心修行。便曰至善也。至重也。第吾不暇耳。處不至善不至
重。則暇迄爲至善且重者。卽曰不暇。非猖狂哉。人縱有甚
急事。未嘗不日日却冗。再三食也。未聞曰不暇矣。以養身
必却冗於事隙。如此其勤焉。以養心不能乎。爲養心德求
汝。却冗於事隙。亦足覩赧甚矣。矧求而不得之與。痛哉痛

哉。

呻

人二

篇

卷



人於今世惟僑寓耳

第二

馮大宗伯問余曰。吾觀天地萬物之間。惟人最貴。非鳥獸比。故謂人參天地。然吾復察鳥獸。其情較人反爲自適。何者。其方生也。忻忻自能行動。就其所養。避其所傷。身具毛羽爪甲。不俟衣履。不待稼穡。無倉廩之積藏。無供爨之工具。隨食可以育生。隨便可以休息。嬉遊大造。而常有餘閒。其間豈有彼我貧富尊卑之殊。豈有可否先後功名之慮。操其心哉。熙熙逐逐。日從其所欲爾。人之生也。母先痛苦。

赤身出胎。開口便哭。似已自知生世之難。初生而弱。步不能移。三春之後。方免懷抱。壯則各有所役。無不勞苦。農夫四時反土於畝畝。客旅經年。遍渡於山海。百工無時不勤。動手足。士人晝夜劇神殫思焉。所謂君子勞心。小人勞力者也。五旬之壽。五旬之苦。至如一身疾病。何啻百端。嘗觀醫家之書。一目之病三百餘名。况整此全體。又可勝計乎。其治病之藥。大都苦口。卽宇宙之間。不論大小蟲畜。肆其毒具。往爲人害。如相盟詛。不過一寸之蟲。足殘七尺之軀。

人類之中。又有相害。作爲凶器。斷人手足。截人肢體。非命之死。多是人成。今人猶嫌古之武不利。則更謀新者。輾轉益烈。甚至盈野盈城。殺伐不已。縱遇太平之世。何家成全無缺。有財貨。而無子孫。有子孫。而無才能。有才能。而身無安逸。有安逸。而無權勢。則每自謂虧醜。極大喜樂。而爲小不幸所泯。蓋屢有之。終身所愁。終爲大愁所承結。以至於死。身八上中。莫之能逃。故古賢有戒其子者曰。爾勿欺已。爾勿昧心。人所競往。惟於墳墓。吾曹非生。是乃常死。入世。

始起死。曰死則了畢已。月過一日。吾少一日。近墓一步。常畏所不得避。患何時安乎。夫此只訴其外苦耳。其內苦誰能當之。凡世界之苦辛。爲真苦辛。其快樂爲僞快樂。其勞煩爲常事。其娛樂爲有數。一日之患。十載訴不盡。則一生之憂事。豈一生所能盡述乎。人心在此。爲愛惡忿懼。四情所伐。譬樹在高山。爲四方風之所鼓。胡時得靜。或溺酒色。或惑功名。或迷財貨。各爲己欲所牽。誰有安本分而不求外者。雖與之四海之廣。兆民之眾。不止足也。愚矣。然則人

之道人猶未曉。况於他道而旣從孔子復由老氏。又從釋氏而折斷天下之心於三道也乎。又有好事者別立門戶。載以新說。不久而三教之岐必至於三千教而不止矣。雖自曰正道正道而天下之道日益乖亂。上者陵下下者侮上父暴子逆君臣相忌兄弟相賊夫婦相離朋友相欺。滿世皆詐謗誑誕而無復真心。嗚呼誠視世民如大海中遇風濤舟船壞溺而其人蕩漾波心沉浮海角且各急於已難莫肯相顧或執碎板或乘朽蓬或持敗籠隨手所值急

操不捨而相繼以死。良可惜也。不知天主何故。生人於此患難之處。則其愛人。反似不如禽獸焉。余答之曰。世上有如此患難。而吾癡心。猶戀愛之不能割。使有寧泰。當何如耶。世態苦醜。至如此極。而世人昏愚。欲於是爲大業。闢田地。圖名聲。禱長壽。謀子孫。墓弑攻併。無所不爲。豈不殆哉。古西國有二聞賢。一名黑蠟。一名德牧。黑蠟恒笑。德牧恒哭。皆見世人之逐虛物也。笑因譏之。哭因憐之耳。又聞近古一國之禮。不知今尚存否。凡有產子者。親友共至其門。

哭而弔之爲其人之生於苦勞世也。凡有喪者至其門作樂賀之爲其人之去苦勞世也。則又以生爲凶以死爲吉焉。夫夫也太甚矣。然而可謂達見世之情者也。見世者非人世也。禽獸之本處所也。所以於是反自得有餘也。人之在世不過暫次寄居也。所以於是不寧不足也。請以儒喻。夫大比選試是以士子似勞徒隸似逸。有司豈厚徒隸而薄士子乎。蓋不越一日之事。而以定厥才品耳。試畢則尊自尊卑自卑也。吾觀天主亦置人於本世。以試其心而定

德行之等也。故見世者吾所僑寓。非長久居也。吾本家室不在今世。在後世。不在人在天。當於彼創本業焉。今世也禽獸之世也。故鳥獸各類之像。俯向於地。人爲天民。則昂首向順於天。以今世爲本處。所者是欲與禽獸同群也。以天主爲薄於人。固無怪耳。天主所悲憫于人者。以人之心全在於地。以是爲鄉。惟泥於今世卑事。而不知惶望天原。鄉及身後高上事。是以增置荼毒於此世界。欲拯拔之焉。且天主初立此世界。俾天下萬物。或養生。或利用。皆以供。

事樂我輩。而吾類原無苦辛焉。自我輩元初祖先忤逆上
主其後來子孫又效之。物始亦忤逆我。而萬苦發。則此多
苦。非天主初意。乃我自招之耳。大宗伯聞畢。嘆曰。噫嘻。此
論明於中國。萬疑解釋。無復有咎天之說。天何咎乎。夫前
聖後賢。凡行道救世者。其一生所作。莫非苦辛焉。設造物
者。令成道之人。身後與草木並朽。而無有備樂地。使之永
安常享。則其所歷苦辛。造物者竟無以酌之。豈不使世人
平生疑惑乎哉。且高論所云。無非引烝人于實德。沮人欲

不殉虛浮。堅意以忍受苦辛。不令處窮而濫。強志以歸本。
分別尊類於醜棄。皆眞論也。從是日。大宗伯大有志於天
主正道。屢求吾翻譯聖教要誠。命速譯其餘。又數上疏。排
空幻之說。期復事上主之學於中國諸庠。嗚呼。傷哉。大宗
伯大志將遂。忽感疾而卒。遂負余之所望也。嗚呼。今而後
大都之中有續成其美意者歟。余日望之。

常念死候利行爲祥

第三

余問於徐太史曰。中國士庶皆忌死候。則談而諱嫌之。何意答曰。罔已也。昧已也。智者獨否焉。子之邦何如。余曰。夫死候也。諸嚴之至嚴者。生之末盡。人之終界。自可畏矣。但敝邑之志於學者。恒懼死至吾所。吾不設備。故常思念其候。常講習討論之。先其未至。豫爲處置。迨至而安受之矣。人有生死兩端以行世。如天有南北二極以旋達於宇內。吾不可忘焉。生死之主。不使人知命終之日。蓋欲其日日。

備也。有備則無損矣。聖經曰。守矣。夫將來如偷者。偷者闖主莫慮耳。是以凡聞訃皆驚曰。某斃乎。曰某斃乎。誠不意其死矣。聖教中凡稱賢。稱聖者。無不刻刻防死候。目對心惟以爲沮惡振善之上範也。徐子曰。如是急乎。余曰。生人所明。莫明乎死之定。所不明。莫不明乎死之期。不論王公賤僕。盡人之子。誰不有一日焉。或旦不及暮。或暮不及旦。乎。誰居甲能保乙乎。汝不知死候。候汝於何處。汝當處處候彼可耳。故智士時冀死候相值。持此爲生也。世之大惑。

視死候若遠焉。抑孰知此身恆被死耶。吾今已死大半耶。
旣往之年。皆已爲死將去耶。旅人航海宿船上。坐立臥食。
如停不行焉。而其身晝夜遷移。曾無止息。且不問汝欲不
欲。倏就岸而須登矣。二船相值。其間各以彼爲行動。以已
爲住止。而實則俱行矣。世人或謬云。吾命今日如是詰朝
亦如是。而吾生實汲汲趨沒無停也。雖誤云。彼有疾且死。
我安且生。而彼我息息並就終也。有以勺勺盡甕水。將謂
未一勺乃竭盡之乎。非也。自初至末。每勺竭盡之矣。夫人

命亦謂卒日爲終。而實日日終之矣。夫吾此生命也。非如西江之水也。江水有源。下流洩之上流增之。則江永存不涸也。生人者如燭耳。恒自消化。誰益之膏油乎。故漸至燼滅矣。人少而冀長。長而冀壯。皆如冀死也。已壯之後隨老。老之後隨死矣。誰欲行路而不欲至其域乎。是以總總蒼生。吾未識死人寓此世界中活耶。抑活人寓此世界中死耶。未定也。徐子曰。子之玄語皆實今世俗之見。謂我念念言。言行行。悉向善。卽善矣。如念死候之不祥。便目爲凶心。

凶口焉。是故諱之。余曰。不然。施我吉祥。卽爲吉祥。施我凶
孽。卽爲凶孽。是死候一念。能祐我。引我釋惡而就善。則世
之祥孰祥乎。是耶。彼言域而竇。乃言至域之道。欲至其域。
先由其途。惟途難焉。子不聞爲善如滌。流行舟乎。有常念。
死候之近。而不得免。心於縱恣者焉。况以是憚凶心凶口。
而諱言之。是非長惡之門歟。凡不肖從欲者。槩由忘死之
近。而自許壽修之僥倖耳。若爲善者。自許壽不如。自許天
矣。蒼生之生宇內。如矢如鳥。速飛無遺跡。如影如夢。無體

可持也。而人於此營大業。如永久居焉。哀哉。南方有國名
黑。入多古法。未造墳墓。不得製室屋。其俗居室陋隘。而墳
絕廣大。謂居室次寓數年之暫。吾常居者。獨墳耳。故以此
爲急崇飾之也。敝鄉昔年有隱士。名雅哥。般棄家遊世。一
切捐捨人目爲瘋狂。有一友買得四雞。囑令攜歸家。雅哥
般許之。徑持去。其人還家。問則無有。謂雅哥般誑已也。他
日遇諸塗。就而問之。曰。向托汝雞。安在乎。曰。汝命歸汝家。
安在乎。其人訝之。引與偕行。至其人生塙中。則四雞在焉。

其人愈益訝曰。吾托汝攜歸家。曷置之塚乎。曰。彼汝寓此。汝家也。嗟乎。雅哥般曷狂。其爲此以警我曹。不其深歟。夫造物者。造人貴絕萬類。但其壽不及樹木與禽獸者。何意乎。今之人壽短於古。造物者惜憐之耳。子不見世愈降俗。愈下乎。父之世不如祖生。我世不如祖父。而我以後將轉之於益下者孫也。人增咎天增罰。不善之殃矣。然則人之生世。亦終身煩冤耳。徒得生之名。而實與苦俱來。與苦俱去也。百年之中。非是度生。是度苦海也。則死豈非行盡苦。

海將届岸乎。苟歲月久長。豈非逆風阻我家歸乎。嗚呼世人以命之約者。省苦也。減咎也。則死非凶凶之終竟耳。似不爲刑罰。刑罰之赦耳。君子明知天主借我此世。以僑寓。非以長居。則以天下爲寓。不以爲家。吾常生別有樂地爲我常家焉。且本生之壽縱長久。比之常生。不減其爲短也。可勝言哉。輿地總誌記泥羅河之濱有鳥焉。日出而生日入而死。則其壽盛乃一晝耳。必夫在卯爲嬰。偶死爲殤。以辰已爲幼。爲壯能見日中爲至艾。頌自以未爲老。而幸得

至申酉爲耋爲耄矣。豈異吾於百歲之微置是節乎。是以志乎常生者。凡有終之生。咸爲須臾。持此須臾。端倪爲吾身後全吉大凶之所關係。故不可不慎焉。凡所望於壽修者。冀以了畢是生之事耳。智者未至死而生之事已完矣。若不肖者。已死而未嘗始生也。凡真實急切之行。俱待明日矣。不知從明日者。必不能得之焉。已至明日。明日非明日。乃今日也。明日已往矣。誠如翻車水箭。先後比次。次箭裁上。則前箭已傾矣。席上設有餚饌百器。而曰其中有一

器盡也。食必死。則此百器者。吾全不甘嘗之矣。吾數日之
命。明知必有一日待死。而不知何日。則我宜一一疑之。而
不迷於其樂。夫人命非獨短淺而已。短淺之中。尤無定期。
何日不聞某暴病死乎。某被壓被溺被焚死乎。某行市偶
飛瓦中首冒風死乎。某出門偶蹶輒僵不起乎。某腹痛
誤飲湯一杯死乎。某夜新娶詰朝已亡乎。塵埃易散。琉璃
易碎。猶不足喻人命之危脆也。吾命無一日之定。而忙人
圖多年之謀。若壽在其手焉。從而分定其事。如裂衣者置

帛於案而分畫之。以若干爲衣。若干爲裳。愚也哉。嗚呼。母恃年之茂。身之強。所見死亡。往往幼者多。乎老者。强者多乎弱者也。子入陶肆。閱諸器。小大厚薄不一。問是諸器孰先壞。必不曰薄者先壞。厚者後壞也。又不曰先出陶者先壞。後出陶者後壞也。惟曰先偃地耳。葆祿聖人謂人之身與焉。曰吾曹得金貝。藏於陶具也。則此身體陶器焉。易碎矣。何論稚老哉。吾視圖畫以手摸之。其所畫物物皆近。而巧士以法加減色。使我目誤視。或如遠焉。或如近焉。世界

一圖書耳。人人皆近於死。無復遠者。不可信目之化而謬
曰。或遠或近矣。以是觀之。吾不謂今日乃我所稟命終之
日。必不能使我善用此日也。以吾年寡多爲善行。是預獲
長壽利矣。至耆老而不能爲善。豈不失長壽利乎。人壽恒
短。人欲恒長。短其壽者。戒其欲之長也。苟能自知前路。不
長所當止宿。不遠何必盛聚資費哉。未老謀善度生。已老
則圖善受死可也。老者勤積財尤異焉。家彌邇彌急於路
費。平特伯國法。老者至八旬。毋許用醫。曰。此時非謀生之

時乃備死時耳。士君子生或逢時不幸，不容我善度生。孰能禁我善受死乎？吾願生死均善不可得兼。寧善死焉。一死光明照耀終生也。昔有問西土賢疇之壽爲至長。曰至至善之候。又問君子生世宜幾何時。日至可生之分限耳。辣責德滿。西土之名邦也。其習俗視生死無二。惟論理當否。有詩人作詩云。士臨陣與其失命。寧失刃當路。聞之以爲大謬。流之遠方。其餘風及於閨閣。亦皆輕死尚義。本國史載。一母有子出禦寇死之。或告之曰。令子死國難矣。母

安坐弗動曰我政爲今日生此兒也是生已足矣由此論之可見本世生姑爲生而煩苦實甚歲月漸消危淺無比則生而似死焉此理明甚無可疑也然此世界中無他生不得不以知覺運動爲生既以爲生不得不以氣盡命終爲死但此死期凡有生者常當念之念之甚有利於道行矣故今猶須畧揭其形狀也夫死之候有三艱一在死前一在死際一在死後焉凡人將死既先遭厲虐疾不可療已則良友泣涕囑耳語之曰有後事宜相付囑者速言之

矣。命幾以泯矣。吾從蓐間聞此語。則慄慄戰懼。不知身後
何如也。惟默歎曰。此日月已矣。我永永不可再覩之矣。吾
所愛良田廣宅。珍貝盈篋。非我有。徒爲他人積矣。妻子兒
女。不得復相聚矣。徒戀愛無益矣。嗚呼。已往若干年。遽去
如電。而使我至此殮殮也。蓋曩所甚愛。此時覩之。甚傷心
也。存之以樂。失之以憂。則前多愛。今多死矣。是故賢妻孝
子女。此時避而不忍見也。見而增彼此之哀痛故也。爲吾
友者。或備棺槨。或製衰麻。爲親戚者。或斂家具。或守財策。

吾展轉床第間。惟有幽憂墳膺耳。此則未死前也。死非他。
惟靈魂與形體分別耳。凡二物相脗合者。莫如靈與身之
親切也。合既密。分之愈難矣。兩友偕行於途。臨岐尚猶惜。
別。况一生同體之交乎哉。卽見遍身失潤色。而貌變目深。
鼻稜口暗。耳燥足冷。脈亂心動。四體流汗。哀哉哀哉。夫人
以母痛入世。以己痛出之。出入皆痛。惟死時痛在我身尤
切矣。及至將死。則仰而見天主義怒吾前行。俯而思一生
之歲月。都費之以造惡。向前而觀。無窮幽暗之路。下而視。

視地獄苦谷之門大開。以我翕吞。左右旋觀而有羣魔俟我。神魂出身而捨之。傷哉。此時欲進而不堪。欲退而不容。欲悔而無及。卽恨其生而死已。此則死際也。及至死後。所苦患又甚焉。何者。死之後。我之所存。魂與魄耳。魄卽爲尸。尸爲腐肉。腐肉爲蟲蛆。蟲蛆化歸於土。此則賢否無異焉。請隨視惡人之靈魂。夫旣出身外。忽見移幽陰異界。輒置之天主嚴臺前。以審判一生之所爲。則盡出籍記。詳載行事。無遺。于是所得非義之財。所取非淨之樂。藐法欺君。酷

虐暴民。順私意。傷剥孤弱者。皆來受其報也。于是淆亂神
道。抗侮上主。妄尊異端。詐僞誣世。無所懼畏。既見主威在
上。審罰無奈。顫慄而無所逃也。於是不肖人所掩諸醜情。
陽廉陰貪。外飾正內。釀邪見過。不圖改見義不肯若。諸喫
隅閭事。心中所藏。逆公之謀。非禮之欲。非法之念。人目所
不及。一一發露。不可蔽焉。天地萬物。并我自心。皆從而訐
我證我。則我焉辭乎。在生多見天主慈惻。天主寬容。至此
始見天主之義怒威嚴也。則我何禱乎。誰復解救之乎。于

是方知財賄已無。而惟有犯理得財之罪也。穢樂之味。速
過。而取穢樂之咎。常遺也。傲矜之氣。已隨風而散。而惟留
傲矜所招之刑。永悠不脫於身也。則第得恨已。恨天。懊惱
而受無限殃痛。嗚呼不已矣。此難之至難。在死之後也。





人二

卷一

二

常念死候備死後審

第四

徐太史明日再就余寓。曰。子昨所舉實人生最急事。吾聞而驚怖其言焉。不識可得免乎。今請約舉是理。疏爲條目。將錄以爲自警之首箴。余曰。常念死候有五大益焉。其一以歛心檢身。而脫身後大凶也。蓋知終乃能善始。知死乃能善生也。知家財乏。則用度有節。知壽數不長。則不敢虛費寸陰。不然者。如行霧中。前後不知。惟見目下耳。舟師使船。必有路程。有地圖。日記。已行幾何。以知其所餘於後也。

坐必船後。卽知其船前事。乃以舵張翕之矣。吾人行此生之路。亦如是也。日記其日已往。而自置已於此生之末。乃能善迪檢一生之事也。又如魚潛以尾。引海中路也。鳥飛以尾。導空中路也。行此世。非如於海於空乎。非以死候之尾。永言念之。難乎免焉。恒以心居死候。則知生際所當爲。吾欲知生際一事。當行耶否耶。卽思此事。是我死候所願得於生前者耶。抑否耶。如此開導。豈不痛切哉。古賢裴羅谷氏。六年處塚內。伯辣漫人之俗。家門之外。卽是墳墓。出

入顧瞻之。西土吾同道幾百國。大槩葬死皆於城中。夫皆懼忘死之備。而立計畫以自提醒耳。昔西隣國有賢王傳。不傳其世代名號。惟時君老僅一子。當嗣國子輕佻無威儀。荒縱自肆。國民患之。有司以告王。請戒諭焉。王訓約百方。弗若也。則命士師曰。王世子犯重法。依法治之。勿赦。不日。世予以舊行奸宄事。士師拘囚訊鞫之。律當大辟。至日。則出以行刑。世子見事窘。請詣王所。與父王面訣。許之。至王前。訴曰。以王之子。國之上嗣。如匹夫死於刑下。理乎情。

乎。王灑泣曰。非我也法也。吾豈忘父子恩。既而暫免汝。目
下刑。吾讓汝爲王。七日。七日之內。恣汝意行樂。滿七日。自
往士師所伏法矣。語畢。卽解王衣裳。袞冕服之。令卽王位。
百官皆聽其命。已退而燕處了。不與國政矣。第俾一陪僕。
從世子。每日夕卽提稟云。七日限今已過若干日也。如是。
諸日。世子一意盤樂。娛玩無倦。獨至夕。聞僕之提警。卽大
驚寤。憂愁不勝。迨第七日期已逼迫。啟請遊樂畢。無歡悰
矣。王至期出。卽問世子。七日之樂何如。曰。何樂乎。王曰。一

國之力。不足供一人樂乎。對曰。然而夕夕有一僕來以就刑。日數提刺我心。於是日日知我命就終。竟滅諸樂已。王曰。人人日日無不就終。壽數不等。而均寡焉已矣。以後汝可保國矣。往昔所犯大赦於汝。惟自今後令此陪僕依前七日夕夕提警汝念也。通國士民聞之大喜。世子謝教謝恩。而悉改前行。父歿代立。亦爲賢君也。視此可驗幾載之教誨。百端以移其心。終不能致。而七日死候之念致之矣。是陪僕之設。智者不可無也。恐世事脫其心。而忘之故也。

其二。以治淫慾之害德行也。五慾之炎發於心。則德危。而受彼燒壞。此死候之念。則一大湧泉滅彼熾焰。故於懲戒色慾。獨爲最上良藥也。吾在世。若已結證罪案犯人。從囹圄中將往市曹行刑。標榜我自負之以行。而於道中適遇喜樂事。何堪娛玩乎。若翰聖人設一喻。狀世人取非禮之樂也。甚善。其言曰。嘗有一人行於曠野。忽遇一毒龍。欲攫之。無以敵。卽走。龍便逐之。至大阱。不能避。遂匿阱中。賴阱口旁有微土。土生小樹。則以一手持樹枝。以一足踵微土。

而懸焉。俯視阱下。則見大虎狼張口欲翕之。復俛視其樹。則有黑白蟲許多。齗樹根。欲絕也。其窘如此。倏仰而見蜂窩在上枝。卽不勝喜。便以一手取之。而安食其蜜。却忘其險矣。惜哉食蜜未盡。樹根絕。而人入阱。爲虎狼食也。是奚謂乎。人行曠野。乃汝與我生此世界也。毒龍逐我者。乃死候隨處逐人。如影於形也。深阱者。乃地獄之憂淚苦谷也。小樹者。乃吾此生命也。微土者。乃吾血肉軀也。虎狼者。乃地獄鬼魔也。黑白蟲齗樹根者。乃晝夜輪轉。減少我命也。

蜂窩者。乃世之虛樂。哀哉。人之愚。甘取之迷。而忘大危險。
不肯自拯拔焉。哀哉。西土有兩泉相近。其一泉水。人飲之。
便發笑。至死不止。其一泉水。人飲之便止笑。而瘳其疾也。
使人笑至死之水。是乃世樂迷人。壞其心也。止笑瘳疾之
水。則死候之念耳。可不旋酌之乎。其三。以輕財貨功名富
貴也。夫物也。非我有也。非我隨也。悉乃借耳。何足戀愛乎。
身後人所去所也。彼所無用財爲。亦無重財爲矣。吾曷不
萃彼所之所尚乎。惜乎。妄人於已所。不在受譽於已所在。

受苦也。夫物汝曾躋其得之之娛。而未試其失之恨。請毋觀其來。觀其去。毋觀其面。而觀其背歟。夫進而聊帶僞樂。而退乃大遺真憂也。聖經所謂財人已畢其寢。而手中無所見也。言有人夢捉得金銀滿手。喜甚。急握固之。忽然而寤。卽空拳耳。經不曰人財。而曰財人。以是貪得者。非我使財。爲財所使。是財奴也。不曰得財。而曰夢得財。蓋其富厚百年。猶一夜之短夢耳。且狀其情。以一舊事。極著明焉。昔有一士。交三友。而情待不等。其一愛重之深於己。其一愛

重之如已。其一甚菲薄。希覲面焉。忽遇事變。國主怒。逮訊之詔獄。士聞之。卽急走其上友。訴已窘急。幸念夙昔冀援手焉。其友曰。今日特不暇救汝。政與他友有嬉遊之約。當候於此。不得動移。祇能送汝衣一襲。輿一兩耳。士悵然歎息。則走其中友。愈益悲泣。訴已患。祈勿襲前友。特脫我干厄也。友曰。今日適遠行。不暇。惟得偕汝行。至中途。遠則至公府門耳。訊獄在內。吾不得與聞也。則益窘。而悔曩昔擇交之悞也。旣而思彼小友。素忠實。或能救我乎。未可知。至

其所無奈愧怍。不得已先告以二友相負狀。又自咎曩之
菲薄。請勿介意也。惟幸念一日之雅願。邀大德無棄我矣。
友曰。吾故寡交。恒念汝汝。今勿憂此等事。惟我能任之。便
相拯濟。爲好我者勸也。言畢。卽先行趨王所。此友之寵於
王也異甚。則一言而釋士。竟無虞矣。是奚謂乎。士遇事變。
卽人之死候。上主將審判。我一生不善行也。其三友者。一
財貨。一親戚。一德行矣。夫財貨室屋田產。自不能運動。惟
與我葬服。及棺槨耳。夫親戚朋友。惟送我山間。及墳墓之

外。自不能入矣。第德行陰隲。人雖不甚重之。却能保身後之急。且以我救也。以是可見死候之念。導人以明世物之虛實。矣能隨我者。乃我事也。實也。不隨我者。非我事也。虛也。沙辣丁者。西方七十國之總王也。將薨。取葬衣命一宰臣。揭諸旂竿之首。行都邑中。順塗而大呼曰。沙辣丁七十國王。今去世。惟攜此衣一稱耳。噫。詎不亦此意乎。野狐曠日饑餓。身瘦臞。就雞棲。竊食門閨。無由入。逡巡間。忽睹一隙。僅容其身。饑亟。則伏而入。數日飽飫。欲歸。而身已肥。腹

幹張甚隙不足容。恐主人見之也。不得已。又數日不食。則
身瘦臞如初入時。方出矣。智哉此狐。吾人習以自淑。不亦
可乎。夫人子人生之隙。空空無所有也。進則聚財貨富厚
矣。及至將死。所聚財貨不得與我偕出也。何不習彼狐之
智計。自折閱財貨。乃易由乎哉。問何者爲真富。必曰廣有
重物。能恒存不受壞者爲真富。故良田腴產。謂富人之本
業焉。夫田產於人。火不得爇。水不得漂。盜不得負而趨。年
遠不得鎖損。於諸物中。獨爲堅久。故善持富者。寶之。何況

於德更萬倍堅久乎。德不畏水火盜賊彌久彌固。不相脫離。生死我隨也。此爲人之大本業也必矣。其四以攻伐我倨敖心也。倨敖之氣諸德之毒液也。養敖者其道心固敗矣。夫敖之根本弱也。以虛爲實。以無爲有。以他爲已也。故常念死候。不俾自昧自爽已矣。孔雀鳥其羽五彩至美也。而惟足醜。嘗對日張尾。日光晃耀成五彩輪。顧而自喜。倨敖不已。忽俯下視足。則歛其輪。而折意退矣。敖者何不效烏乎。何不顧若足乎。足也人之末。乃死之候矣。當死時。

身之美貌。衣之鮮華。心之聰明。勢之高峻。親之尊貴。財之豐盈。名之盛隆。種種皆安在乎。何不收汝輕妄之輪乎哉。古者西土有總王。名厯山。奄有百國。幅員數萬里。無勝其富而心傲。甚猶若不足。既薨。葬埋之侈。殯極華美。時有名賢。觀其塋。譏之曰。夫人昨也。踵土。今也爲土踵矣。昨也彼藏金玉。今也金玉藏彼矣。昨也寰宇不足容之。今也土窟三尺。則足矣。嗚呼。行世之際。有尊卑。死之後。無尊卑也。誠若象戲焉。運於枰局。將卒異位。殊道。及事畢。覆局。則雜位。

同道矣。目者無所不見。惟不見己也。見已有道。以鏡照焉。人者無所不識。惟不識己也。識己豈遂無道乎。以死者之髑體鑒焉。彼昔如我。今我後如彼。今也往日。余有友。常畫髑體形。懸於齋室。以自警也。彼詎不善於圖畫古器之設乎。其五以不妄畏。而安受死也。造物主。每造一物。卽各賦以愛己之心。是者不論靈蠢。物有之。則畏死欲生之性。人人均也。然而生死。皆聽天主之命。人自求死。卽不可人。強求生。亦不可。何者。天主固不令人自擅死也。若士卒非

帥命不敢離行伍也。倘終竟不欲死。是爲悔旣生焉。夫生
死之主。借爾此生。實陰約以死而還之。如左券在彼。不願
死。則失約而悔其已生矣。貪財不可而貪生可乎。欲負約
賴人之財不可。而欲負約賴天主之生可乎。吾鄉人亞入
西勞氏。西極之名將也。經踰阿林波山時。方市。市爲天下
最盛。或請觀之。曰無貨不備。辭曰。有售長生者。吾則往矣。
陋哉。若人不貪貨。而貪生。并貪下流也。別有真儒。承國主
大封。問使者曰。上賜我此祿。亦賜我壽命。以久享之乎。使

者曰。否。此天主恩耳。儒者曰。旣爾。我則往事天主。自修我行。以我身後求享天祿矣。辭不拜受。夫願常生。則進求常生之路可也。汝於死人之域。于常生謬矣。夫死候者。須臾耳。雖嚴而速畢。何當懼之乎。吾不能無死。然而能免死之懼也。狂者與嬰兒不懼死。吾反弗克焉。彼愚而我智也。愚能與人以安。智能與人以不安。哀哉。夫真智之君子。備死也不畏死也。死候無時。不在其念。譬如良將。時時不忘戰。是備敵也。非畏敵也。夫死候之念。初來以威。次來以慰。卒

來以喜也。武士入都試。或有驚馬。則數日前肄習之馬。塈間使勿驚。至試日。馬已習弗驚也。人心於死候亦如驚馬矣。吾以念死心習之。塈間至真死候。則已習弗悞我大事也。夫人所畏於死者。非死之瞬息。乃瞬息之後所紀也。此畏也。最能引我於善。則宜存養之。不宜却去之也。試思吾自今以後。有日將我一生中。日日刻刻。凡眼所視。耳所聞。口所啖。鼻所嗅。四體所動。才所爲。心所愛。合理與否。一一藉計無漏焉。無爽焉。凡善與惡。悉審察以按判。孰不懼乎。

既懼之。必有助以歛心。以謹行者矣。故敝鄉有賢者。修道八十餘年。臨歿時。四體戰兢。旁人問其故。答曰。是懼也。非始自今也。吾平生有之人。曰。眾皆云夫子道已成也。何懼也。答曰。天主審判嚴矣。其耳目於我也。猶人乎哉。可弗懼與。古又有一人死。而兩日後復生。又生世十餘年。竟不發一語。亦絕不見笑哂。默居靜修。其復死日。諸友強問之。惟曰。人不知死後審何如。使知之。夫語畢而死。蓋君子於天下無所與。無所愛。卽無所愛。無所愛。則捨之無恨也。其志在

天上不在人間。以彼爲家。客聞欲近家。不啻無憂。且大喜焉。以此軀壳爲囚禁。爲桎梏。則見其壞朽。無任娛樂。如囚人視狴犴垣壁裂。桎梏壞爛。乃望其解脫拘繫。可歸故鄉。何憂哉。第兢業日慎。不敢輒自居。安居賢。猶恐德未成也。是以孜孜矻矻。惟日不足矣。徐子曰。於戲。此皆忠厚語。果大補於世教也。今而後。吾知所爲備於死矣。世俗之備於死也。特求堅厚棺槨。卜吉宅兆耳。孰論身後天臺下嚴審乎。余曰。迂哉。重所輕。輕所重。莫凶乎是也。文王墓在豐鎬。

而周公作詩。以誥其後王曰。文王在上。於昭于天。則豐鎬之文王。文王之灰燼焉耳。吾忘已之精靈。而獨顧吾灰燼乎。夫遺魄朽於高。朽於下。終生思之。未審何異歟。棺槨所不覆。固天覆之矣。厭其薄乎。然厚葬親者。自是人情。不必非之所叮嚀者。惟毋自菲薄吾神靈焉。此世一生耳。而身後永常苦樂。皆自今造之。今世也。吾有不善可蠲。吾有善可增。此生以後。絕不能也。死後。按察賞罰之時。也有未犯王法。未得罪於人。而偶經過於司生殺者之前。入其庭。猶

且惴惴焉。矧終其身所爲。莫非違天命。獲罪於天主。臨死時。將至乾坤主宰嚴臺之前。按我萬世罪殃。而且得晏然乎。不思乎。妄望僥倖免乎。自昧而不信乎。謬矣夫善備死候者。萬法總在三和。三和者。和於主。和於人。和於己是也。得罪於主。無所逃。不從主而禱。孰禱乎。繫在此。則祈解亦在此矣。卽復勤詢天主所貽至教。習其情。悔責吾前非。立心於守聖戒。以息主怒。以致其神寵。此以和主也。吾藏人非義財物。卽還之其人。嘗毀謗人。玷缺其名行。卽以真實

語獎許之。復成立之。嘗與人交爭。傲狠有讐。卽恕宥和睦。好待之。此以和人也。凡有以酒色自汚。饑本身。以醜念邪情。亂熒心靈。卽時洗滌。新新修善志。歸道體。或有誘惑我。於非義。遠離廢之勿惜。此以和己也。嗚呼。倘死者已受主刑。今能復生於世。一刻以改前非。移心於道德。不難出無量之價。無苦不甘心取之。以易之。其如不可得。而吾承啟。心以忖悟。備死候之實範。若不圖迅行之何心哉。

君子希言而欲無言

第五

曹給諫問余曰。聖人皆希言而欲不言也。奚謂乎。余答曰。夫言非言者所自須。乃令人知我意耳。若人已心胥通。何用言。如人面語。可省簡牘也。聖人言以誨民。民自知。則其言之工止矣。民弗知。聖人始言焉。然博雅之言。言約而用廣。蓋粹言比金鉦焉。微而賈重矣。是以聖人罕言而欲無言也。無言則人類邇於天神。所謂人以習言師人。以習不言師神也。故天主經典。及西土聖賢。莫不戒繁言而望學

者以無言焉。曹子曰。吾幼讀孔子。木訥近仁。及利佞之說。卽有志於滅言。且聞貴邦尙真論。今願聞禁言之法。幸以告我。以証聖人之旨。以堅此寡言於同志也。余曰。竇承命。不敢辭。然茲論也。浩且博。吾試揭數端。予自推其詳備焉。凡不肖者。言不顧行。行不踐言。則易其言也。言也如飛。之彙一出口。不得追而復含之矣。鳥出籠。卽自此樹飛於彼樹。言出舌。亦自此口傳於彼口。不還也。故智者多默。希言。乃爲翦其羽矣。天主聖經曰。多言之際。不能無訛。能守。

已舌乃智之至也。又曰愚者不言。則人將謂之賢者。釋之者曰。愚者未言。與賢者無異。惟舌與音。爲其愚之徵耳。是故宜恒以手掩口也。東亂氏古之賢者。于大眾會不言。或譏之曰。言之窮乎。性之愚乎。曰。然。愚者不能勿言。先世之所寄。臣曰。惟命。獨有一物。臣不敢受寄。問何物。曰。隱密之言耳。曰。何謂也。曰。言也。難收矣。不洩之以聲。恐露之以形。不漏之以醉。恐傳之以夢也。中古西陬一大賢。瑣格刺得氏。其教也。以默爲宗。帷下弟子。每七年不言。則出出其門。

者多知言之偉人也。是默也。養言之根矣。根深養厚。而株高幹枝盛也。又嘗出一名師。教人論辯。所著格物窮理諸書。無與爲比。至今宗用之。而其人每靜默希言。或問之曰。子自不言。何能教人言。對曰。子不見夫礪石乎。已不動。不利。能使刃利焉。凡器之小而虛。則其聲揚。器之大而充。則無音。何謂小人中無學問。惟徒以言高焉。君子充實而美。斯無言也。善行爲善言之証也。行也無音而言矣。故曰善言者。不可以邪行壞之。若言行不相顧。豈不以邪行壞其

善言乎。造物者製人。兩其手。兩其耳。而一其舌。意示之多。
聞多爲而少言也。其舌又置之中奧深。而以齒如城。以
唇如郭。以鬚如檻。三重圍之。誠欲甚警之。使訥於言矣。不
爾曷此嚴乎。夫口也。又心之藩籬焉。故經曰。守言卽守心
也。圍無藩籬。外患卽侵而毀之。心無口之禁。不止受外入
之累。自亦逃而失已矣。舌毋先心可也。吾未嘗不言而悔。
祇多有言之悔耳。敝鄉之東。有大都邑。名曰亞德那。其在
昔時。興學勸教。人文甚盛。所出高俊之士。滿傳記也。責煖

氏者當時大學之領袖也。其人有德有文。偶四方使者。因事來廷。國王知使者賢。甚敬之。則大饗之。而命諸名俊。備主賓之禮。責煖氏居首。是日所談。莫非高論。如雲如雨。各逞才智。獨責煖終席不言。將徹。使問之。曰。吾儕歸復命乎。寡君謂子何如。曰。無他。惟曰亞德那。有老者於大饗時。能無言也。祇此一語。蘊三奇矣。老者四體衰劣。獨舌彌強。毅當好言也。酒於言。如薪於火。卽訥者於是中變而譁也。亞德那。彼時賢者所出。佞者所出。則售言大市也。有三之一。

難禁言。矧三兼之乎。奇哉。教可傳之四表。故史氏不誌諸
偉人高論。而特誌責煖氏之不言也。邦伴氏至德之士。初
發志修行。卽入學其師方講經次。經曰。吾將守我行。以免
舌之咎。聞此一句。卽辭而曰足矣。請先習是句耳。久修而
後反學。師問曰。何遲之久也。曰。未盡習初句。不敢還也。自
後德名藉藉。遽入深山。獨居默修。用以晦迹剗名。而名日
益高。夫名也。如影焉。避就者。就避者。而愈晚愈長。是以邦
伴雖屏居數年。四方共景仰之。於時有尊位持教官。赴山

中見之。邦伴了無言。官曰。乞賜片言。小吏取以布敎。曰。子不取我不言。何能取我言乎。此可謂盡習初句者矣。載香器必固塞其口。不爾原氣渙矣。子承傳於心。苟冀儲之。以備施用。莫若閉口默蓄矣。吁。今之學非爲己。悉爲人耳。故大學師有人以其弟來學。其弟久侍而不言。學師令曰。言之。余以觀汝。夫人在目前。必令言以觀之乎。覲面則視其形。聞言則視其心矣。試人如試陶等焉。叩擊之。陶以音著。其裂人以言顯其疵也。故吾先正每日吾未聞一人言常。

畏之。往時有一士嚴坐於眾士列。良久不言。俄發言。言其人所不達。或曰。此人也而終不言。不亦可謂士乎。默之一藥能療言之萬病矣。世之大惑者。每從師以肆言。無師以習不言也。第不言難。惟英俊能之。耳言欲遂而強止之。如以口含滅光燭。豈不難耶。誌載昔非里雅國王彌大氏。生而廣長其耳。翌然如驢。恒以耳璫蔽之。人莫知焉。顧其方俗。男子不蓄髮。月鬚之。恐其鬚工露之。則使鬚之後。一一殺之矣。殺已。眾心不忍。則擇一謹厚者。令鬚髮畢。語以前。

諸王之被殺狀。若爾能抱含所見。絕不言。則宥爾。工大誓願曰。寧死不言。遂生出之。數年抱蓄不勝其勞。如腹腫而欲裂焉。乃之野外屏處。四顧無人。獨自穴地作一坎。向坎俛首小聲言曰。彌大王有驢耳。如是者三。卽復填土而去。乃安矣。後王耳之怪。傳播多方。或遂究其說。曰此坎中從此忽生怪竹。以製簫管。吹便發聲。如人言。曰彌大王有驢耳。國民因而知其事也。嗚呼。禁言之難。乃至此歟。是故昔西國君誥其賢臣曰。吾於鄉屬有人之胸。特爲流言溝焉。

卽入卽出。無畱乎心。無增乎行矣。彼喧譁之心。無殊於隙
甕。雖斟之美液。四處漏矣。得滿乎。欲塞言之漏。縱不得不
言。可不慎於言乎。曷事敗不因言而
覆乎。所謂人之生死。皆由舌也。善馬不轡銜。不可御。修士
不謹。言不成德。東方鶴初冬去之。西土道牛山。牛山產大
鷹。鳥鶴所忌也。鶴過山則銜小石。恐忘而妄鳴。且受害踰
山方捨石矣。人輩亦過此世之險山。五欲之鷹。張爪吻以
傷此心。何不以默之石塞口。而終日謹謹乎。世之害莫大

乎佞者。佞者以巧言迷人心。如仇讐以金爵酖人命也。其所言非昌。徒以巧詞綺語飾而出之。如塗朱傅粉。婦女之事。非大丈夫之氣也。東格刺得氏。當亂世。卓立自好。正言不屈。奸人謀而陷之於罪。被拘囚以誅焉。其門弟子大憂之。獨已至死不變色。於時有一名士。大雄辨。論理無對。則代之慟而作一文字。剖析事理。甲雪枉抑。使東格刺得持於公堂辨之。必免刑也。躬詣獄致之。東格刺得讀畢。曰。不對不堪用。士曰。此文言切中夫子之事矣。云不對。不堪

用也。曰婦人履稱我足。我亦不著矣。男子氣雖斷於殃。不取於卑陋巧言。而汝安取之。以自敗其德乎哉。佞者致言之病耳。蓋言之期。期以人信焉。立言而無人信。如創室而無人居也。人所深信。乃其所明視耳。汝以言之葉蒙之。則有所不通矣。故人疑而弗信也。藏麥於窖。麥得土氣。欲坼出。而量之多於初。然麥浮敗矣。言在佞人口。盛而憎多。惟無孚也。嘗聞人稱譽人以多聞。未聞稱譽以多言。言雖善也。多則人病之。善言不可多。而虛言妄言罪言可多乎。或

曰。旣爾。宇內何以言爲寧。不皆銜枚而瘡然行世乎。曰。否也。聖人勸寡言。拯扶世流耳。無言孰世乎。禽世耳。惟言眾人。以是別鳥獸賢。以是別愚文明之邦。以是別夷狄也。人無言。虞廷何以拜昌言。孔孟何以知言。且今多聞者。從何而得聞乎。利兵以捍國。禦奸也。有妄持之以刺正人。則目爲凶器。而禁之。非其人不藏焉。是貶言之原由。人誤用耳。聖人欲不言。欲人人皆正行矣。如醫之慈者。欲無醫乎。乃欲天下無病者乎。阤瑣伯氏上古明士。不幸本國被伐。身

爲俘虜鬻於藏德氏。時之聞人先達也。其門下弟子以千計。一日設席宴其高第。命阨瑣伯治具。問何品。曰。惟覓最佳物。阨瑣伯唯而去之。屠家市舌數十枚。烹治之。客坐。阨瑣伯行炙。則每客下舌一器。客喜而私念。是必師以狀傳教者。蘊有微旨也。次後每盤異醬異治。而充席無非舌耳。客異之。主慚怒。咤之曰。癡僕。乃爾辱主。市無他盤乎。對曰。主命耳。藏德滋怒。曰。我命汝市最佳物。誰命汝特市舌耶。阨瑣伯曰。鄙僕之意。以爲莫佳於舌也。主曰。狂人舌。何佳。

之有。曰。今日幸得高士在席。可爲判此。天下何物佳於舌乎。百家高論。無舌孰論之。聖賢達道。無舌何以傳之。何以振之。天地性理。造化之妙。無舌孰究之。不論奧微難通。以舌可講而釋之矣。無舌商賈不得交易。有無官吏不得審獄訟。辯黑白。以舌友相友。男女合配。以舌神樂成音。敵國說而和。大眾聚而營宮室。立城國。皆舌之功也。讚聖賢誦謝上主重恩。造化大德。孰非舌乎。無此舌之言。助茲世界無美矣。是故鄙僕市之。以稱嘉會矣。客聞此理辯。則躍然。

喜。請貰之。因辭去。厥明日。其詣師謝。語昨事。以爲非僕所及。意師之豫示之也。師曰。否。否。僕近慧。欲見其聰穎耳。眾猶未信。師曰。若爾。請復之。隨命阨瑣伯曰。速之市。市殼。宴昨客。不須佳物。惟須最醜者。第得鮮足矣。阨瑣伯唯唯去。則如昨市舌耳。畢無他殼也。席設數下饌。特見舌。視昨無異。客益異之。主忿怒大詈之。問曰。舌旣佳。疇命汝市佳者。何弗若我。而惟欲辱我乎。對曰。僕敢冒主乎。鄙意舌乃最醜物耳。主曰。舌佳矣。何爲醜乎。曰。吾解鄙見。請諸客加思。

而審之。天下何物醜於舌乎。諸家眾流無舌。孰亂世俗乎。
逆主道邪。言淫辭。無舌。何以普天之下乎。冒天荒誕妄論。
紛欺下民。無舌。孰云之。易知易從。大道至理。以利口可辯。
而毀矣。無舌。商賈何得。詐僞罔市。細民何得。虛誣爭訟。而
官不得別黑白乎。以舌之謗諛。故友相疏。夫婦相離。以舌
淫樂邪音。導欲溺心。夫友邦作讐。而家敗城壞國滅。皆舌
之愆也。侮神訛上。主背恩違大德。孰非舌乎。無此舌之流
禍。世世安樂矣。是故鄙僕承命市醜物。徧簡之。惟見舌至

不祥矣。客累聞二義陳說既正。音韻祥雅。俱離席敬謝。教是後主視之。如學士先生也。以是觀之。舌也本善人。枉用之非禮而言。卽壞其善。是故反須致默。立希言之教。以遂造物所賦原旨矣。夫穀言無五毋。有五有也。汚邪巧謗誇五毋也。真直益減時五有也。言毋汚。則近淨而潔者就之。無縱吐汚言以咤小人。而先穢己口也。勿曰彼耳。是宜聞。惟曰。吾口是當言耳。惡言來。吾用惡語報之。是火將熾。而吾施之。繩初惡一。今惡二矣。苟用善言迎之。是火漸延。而

吾徙薪。豈非以我善致彼善乎。毋邪。則近正而端者取之。
正心必發正言。正言未必由正心也。雖然。正言之時。心能
據正。恒自據正。卽有邪心。亦可匡也。若果僞者。并亦不能
恒作正言。斯爲邪耳。鸚鵡鳥能人言。而不自達其意。平時
諱諱。與人無異。忽逢攬擾。卽揚禽聲。而復其咷咷也。詐正
人。善爲仁言。而不自通其旨也。無事便便。與人無異。俄值
拂逆。便轉邪情。而還其偏本也。詐不可久。矧能恒乎。毋巧。
則近質。而誠者尚之。法言素樸。而自光美。不求鮮華之飾。

戾言病醜。不能不借於繪工。愚者雅之。智者病之。行行古之道。言言今之詞耳。毋謗。則近恕。而忠者若之。世道衰下。讒言易發。易傳也。故當戒口以言。戒耳以聞也。無聽讒者。無讒。故讒人與聞讒者。吾未識罪孰重乎。毋謗。則近謙。而教者去之。自伐善者。非因已。旣行德。而言之。乃行德以言之耳。如是以虛德爲實慝矣。以慝易德。吾所伐善安在乎。吾之譽在我口。是反爲訾也。彼稱我善。愛道而長已德。吾自稱已善。冒名而泯已德也。此五毋也。言有真。則無誕。而

人卽信焉。眞言全體相結。僞言始終不類也。眞者如明燭焉。光四射。縱掩藏之。必乘隙而出矣。蒙者。醉者。狂者。三人之言。咸真實無僞。汝爲不然。豈不居三人之下乎。直則無詭曲。而人悅依焉。直路一而去。彼界近。曲之無數。而皆彌遠矣。汝冀蚤赴家。莫善於從徑途也。視利而行。行不得義。察色而言。言不得直也。發矢不直。是無力。安能中乎。張弦不直。則無音。胡得和平。發言不直。則無志無氣。必不及致其所圖也。益則無竅。而人以爲用焉。有千金之言。有無價

之言。誰曰言無直歟。富贈人財。仁贈人言。珍貝利財。忠言利德。二者孰利乎。凡無利於眾。無補於身。悉妄言也。遇事當言。度言之勝乎。不言而後言。無悔矣。減則不繁。而人好繹焉。凡真論欲人易曉。莫若淡且簡也。約言近乎不言。故爲趣矣。少可以成事。何用多爲。無餘無缺。始爲減也。有不言之處。有希言之處。無盡言之處矣。吾言之真。寧使人嗣之以思。無寧使斷之以厭也。時則不誤。而人願聆焉。時而不言。猶不時而言也。時雨。人翹首而望之。時言。人傾耳而

納之皆得其欲也。不對病之藥。縱善而傷身。不合時之言。
縱昌而敗事也。雖然知言之當以時發眾也。知當言之時。
幾人乎。體人之言。真從義之言。直由禮之言。減敦信之言。
益惟智之言。時矣。此五有也。使言無斯五毋。獲斯五有。談
自旦迄夕者。或謂之多言。吾敢謂之希言焉。有言者。人一
聞而喜。此言者。人百聞而猶喜也。語竟。曹子悅曰。旨哉。聞
之。曰。人也於言。如鐘於音焉。大叩之大音。小叩之小音也。
若無叩而音。其妖鐘已。請益。余曰。瞻已。恐中國士誚我。曰。

西士以喋喋勸希言也歟





齋素正旨非由戒殺

第六

李水部設席招余。是日值教中節日。余食止蔬菓而已。李子曰。貴邦不奉佛無殺牲戒。而子齋素何也。余曰。豈獨敝國。中國自三代以前。佛教未入。悉不奉佛也。皆以太牢事上主。悉不戒殺牲也。然而祭之前。有散齋。有致齋。齋者悉不飲酒。不如量今所見士大夫。遇郊社大典。咸斷酒肉。出居官次。是則齋素之義。不由釋氏始。不以殺牲故明矣。李子曰。然吾儒將祭而齋者。將以齊一心志。致其蠲潔。對越

明神也。敢問貴國齋素。何意。時余篋中適有舊藁一帙。中說天主教齋素三旨。卽出帙觀之。其辭曰。因戒殺牲而用齋素。此殆小不忍也。然齋有三志。識此三志。滋切滋崇矣。夫世固少有今日賢。而先日不爲不肖者也。少有今日順道。而昔日未嘗違厥道者也。厥道也者。天主銘之於心。而命聖賢布之版冊。犯之者必得罪於上主。所從得罪者。益尊。則罪益重。君子雖已遷善。豈恬然於往所得罪乎。曩者所爲不善。人或赦弗追究而已。時記之愧之悔之。設無深

悔吾所旣失於前。烏可望免之於後也。况夫今之爲善君子。不自滿足。將必以闢已之短爲離婁。以視已之長爲盲瞽焉。所責備諸已者。精且厚。人雖稱以俊傑而已。愧怍如不置也。所省疚於心者。密且詳。人雖謂其備美而已。勤敬如猶虧也。詎徒謙於言乎。詎徒悔於心乎。深自羞耻。奚堪歡樂。則貶食減食。除其穀味。而惟取其淡素。凡一身之用。自擇粗陋。自苦自責。以贖已之舊惡。及其新罪。晨夜惶惶。稽颡於天主臺下。哀憫涕淚。冀洗已汚。敢妄自居聖。而誇

無過妄自寬已而須他人審判其罪也乎所以躬自懲詰
不少姑恕或者天主惻恤而免宥之不再鞠也此齋素正
旨之一也夫德之爲業人類本業也聞其說無不悅而願
急事焉但被私欲所發者先已篡人心而擅主之反相壓
難憤激攻伐大抵平生所行悉供其役耳是以凡有所事
弗因義之所令惟因欲之所樂嗜其面容則人觀其行與
禽何擇乎有人於此人其性也而將易之使禽其形寧死
不願之今者人其形也而禽其性則安之何哉夫私欲之

樂。乃義之敵。塞智慮而蒙理竅。與德無交。世界之痼疾。莫深乎此矣。他病之害。止於軀殼。欲之毒藥。通吾心髓。而大殘元性也。若以義之仇冤。攝一心之專權。理不幾忘。而厥德尙有地可居乎。嗚呼。私欲之樂。微賤也。遽過也。而屢貽長悔於心。以卑短之樂。售永久之憂。非智之謂也。然私欲惟自本身。藉力逞其勇猛。故遏其私欲。當先約其本身之氣學道者。願寡欲。而豐養身。比方願滅火。而益加薪。可得哉。君子之欲飲食也。特所以存命。小人之欲存命也。特所

以飲食。夫誠有志於道。怒視是身。若寇讐然。不獲已而姑蓄之。何者。吾未嘗爲身而生。但無身又不得而生。則服食爲腹饑之藥。服飲爲口渴之藥耳。誰有取藥而不惟以其病之所須。爲度數焉者乎。吾輩此身。皆當爲蟲所食。甘食厚味。以益其膏。不幾爲蟲作牧人乎。性之所嗜。寡而易營。多品之味。佳而難遂。若窮極口體。逞意貪圖。則以其養人者。頻反而賊人。謂飲食殛人。多乎刀兵可也。今未論所害於身。獨指所傷乎。心多聚飲食之處。多來猫鼠蟲蟻。多饕

飲食之人。多招罪過。其身也。僕役過健。恐忤抗其主也。血氣過強。定傾危乎志也。志危。則五欲肆其惡。而色欲尤甚。豐味不恣。腹色慾何從發。淡飲薄食。色氣潛饒。一身既以理約。諸欲自服理矣。古有問賢者。何則爲學。答曰。脫身耳。解之者曰。阻心之達真者。莫甚乎身樂之誘也。身之樂。以重羈霧晦我心才。使不得外脫。種種諸像。內釋五官之欲。而往察物性。以率造物主命也。故有意於學者。先當拔心於身外也。身也者。知覺屍也。機動俑也。飾墁墳也。罪愆餌

也。苦憂肆也。囚神牢也。實死而似生也。家賊用愛誘損我心。纏縛於垢土。俾不得冲天。享其精氣也。能拔此身。百凶盡熄。心脫阻礙。任天游馴命矣。古賢甘餓。求餒不求飽。其於身也。似仇而實親焉。此齋素正旨之二也。且本世者。苦世也。非索覩之世矣。天主寘我於是。促促焉。務修其道之不暇。非以奉悅此肌膚也。然吾無能竟辭諸樂也。無清樂必求淫者。無正樂必尋邪者。得彼則失此。故君子常自習其心。快以道德之事。不令含憂因而望乎外。又時簡畧體

膚之樂。恐其透於心。而侵奪其本樂焉。夫德行之樂。乃靈
魂之本樂也。吾以茲與天神侔矣。飲食之娛。乃身之竊愉
也。吾以茲與禽獸同矣。吾益增德行之娛於心。益近至天
神矣。益減飲食之樂於身。益逃離禽獸矣。吁可不慎哉。仁
義令人心明。五味令人腐腸。積善之樂甚。卽有大利乎心。
而於身無害也。豐膳之樂繁。而身心俱見深傷矣。腹充飽
以穀饌。必垂下而墜。已志於汚賤。如此則安能抽其心於
塵垢。而起高曠之慮乎哉。惡者觀人盤樂而已。無之斯嫌

妬之矣。善者視之，則反憐惜之，而讓已。曰：彼殉污賤事，而猶好之如此。懇求之如此。吾旣志於最上，而未能聊味之。未能畧備之。且寧如此懈惰，而不勉乎哉？世人之災無他也。心病而不知德之佳味耳。覺其味，則膏梁可輕矣。謂自得其樂也。此二味者，更迭出入於人心，而不可同住者也。欲內此，必先出彼也。古昔有貢我西國二獵犬者，皆良種也。王以一寄國中顯臣家，以其一寄郊外農舍，使並畜之。旣而王出田獵，試焉。二犬齊縱入圍，農舍所畜之犬，身躍

而體輕走。覬禽獸跡。疾趨攫網。獲禽無算。顯家所養之犬。
雖潔肥容美足觀也。但習肉食充腸。安佚四肢。不能馳驟。
則見禽不顧。而忽遇路傍腐骨。卽就而齧之。齧畢不動矣。
從獵者知其同產。則異之。王曰。此不足怪。豈惟獸哉。人盡
然也。皆係於養耳矣。養之以佚。飫飲飽。必無所進於善也。
養之以煩勞儉約。必不悞若所望矣。若曰。凡人習於珍味。
厚膳。見禮義之事。不暇。惟俛焉而就食耳。習於精理微義。
遇飲食之玩。亦不暇。必思焉而殉理義矣。此齋素正旨之

三也。李子讀竟曰。此實齋素真旨。吾儒宜從焉。乃謝而請錄之。

畸人十篇卷上



MAISON MÈRE DES SŒURS
MISSIONNAIRES DE L'IMMACULÉE-CONCEPTION
2900, CHEMIN SAINTS-CATHARINE

